

**НЕДЕЛЯ ВОСЬМАЯ ПО ПАСЦЕ,
СВЯТЫЯ ПЕНТИКОСТИИ
В СУББОТУ ВЕЧЕРА, НА МАЛЕЙ ВЕЧЕРНИ**

На Господи воззвах: поставим стихи 4. И поем стихиры, глас 1-й:

Пятдесятницу празднуем, и Духа пришествие, и предложение обещания, и надежды исполнение, и таинство елико, яко велико же и честно. Темже вопием Ти: содетелью всех Господи, слава Тебе. [Дважды.]

Языками инородных обновил еси Христе, Твоя ученики, да теми Тя проповедят безсмертнаго Слова и Бога, подающаго душам нашим велию милость.

Вся подает Дух Святой, точит пророчества, священники совершает, не книжныя мудрости научи, рыбаки богословцы показа, весь собирает собор церковный: единосущне, и сопрестольне Отцу и Сыну, Утешителю, слава Тебе.

Слава, и ныне: глас 8-й:

Егда Духа Твоего послал еси Господи, сидящим апостолом, тогда еврейския дети зряще ужасашуся ужасом: слышаху бо я вещающа иными странными языки, якоже Дух подаваше им: невежди бо суще умудришася, и языки в веру уловивше, божественная ветийствовашу. Темже и мы вопием Ти: Иже на земли явлейся, и от прелести спасый нас, Господи слава Тебе.

На стиховне самогласны, глас 2-й:

Видехом свет истинный, прияхом Духа Небеснаго, обретохом веру истинную, нераздельней Троице поклоняемся: Та бо нас спасла есть.

Стих: Сердце чисто созижди во мне, Боже, и дух прав обнови во утробе моей.

Во пророцех возвестил еси нам путь спасения, и во апостолах возсия Спасе наш, благодать Духа Твоего. Ты еси Бог первый, Ты и по сих, и во веки Ты еси Бог наш.

Стих: Не отвержи мене от лица Твоего, и Духа Твоего Святаго не отыми от мене.

Во дворах Твоих воспою Тя, Спаса мира, и преклоню колена, поклонюся Твоей непобедимей силе, вечер, и утро, и полудне, и на всякое время благословляю Тя, Господи.

Слава, и ныне: глас тойже:

Троицу единосущную песнословим, Отца и Сына, со Святым Духом: тако бо проповедаша вси пророцы, и апостоли с мученики.

Ныне отпуцаеши: Трисвятое. Пресвятая Троице. **О**тче наш: **Я**ко **Т**вое есть
царство: Отпустительный тропарь, глас 8-й: **Б**лагословен еси Христе Боже
наш: **И** прочее обычно. И отпуст.

НА ВЕЛИЦЕЙ ВЕЧЕРНИ

Обычное стихословие. На Господи возвах: поставим стихов 10. И поем стихиры самогласны 3 первые, повторяюще первую. Таже 5, второго гласа, повторяюще первую.

Глас 1-й:

Пятдесятницу празднуим, и Духа пришествие, и предложение обещания, и надежды исполнение, и таинство елико, яко велико же и честно. Темже вопием Ти: Содетелю всех Господи, слава Тебе. [Дважды.]

Языками инородных обновил еси Христе, Твоя ученики, да теми Ты проповедят безсмертного Слова Бога, подающего душам нашим велию милость.

Вся подает Дух Святой, точит пророчества, священники совершает, некнижные мудрости научи, рыбаи богословцы показа, весь собирает собор церковный. Единосущне и сопрестольне Отцу и Сыну, Утешителю, слава Тебе.

Глас 2-й:

Видехом свет истинный, прияхом Духа Небесного, обретохом веру истинную, нераздельней Троице поклоняемся: Та бо нас спасла есть. [Дважды.]

Во пророцех возвестил еси нам путь спасения, и во апостолах возсия Спасе наш, благодать Духа Твоего: Ты еси Бог первый, Ты и по сих, и во веки Ты еси Бог наш.

Во дворех Твоих воспою Тя, Спаса мира, и преклонь колена, поклонюся Твоей непобедимей силе, вечер, и утро, и полудне, и на всякое время благословляю Тя, Господи.

Во дворех Твоих Господи, вернии колена душ и телес преклонше, воспеваем Тя безначального Отца, и собезначального Сына, и соприисносущного и Пресвятаго Духа, просвещающего и освящающего души наша.

Троицу единосущную песнословим, Отца и Сына, со Святым Духом: тако бо проповедаша вси пророцы, и апостоли с мученики.

Слава, и ныне: глас 8-й: Творение льва владыки:

Приидите людие, триипостасному Божеству поклонимся, Сыну во Отце, со Святым Духом: Отец бо безлетно роди Сына соприисносущна и сопрестольна, и Дух Святой бе во Отце, с Сыном прославляемь: едина Сила, едино Существо, едино Божество. Емуже поклоняющиеся вси глаголем: Святой Боже, вся содеявый Сыном, содейством Святаго Духа: Святой Крепкий, Имже Отца познахом, и Дух Святой прииде в мир: Святой Безсмертный, утешительный Душе, от Отца исходяй, и в Сыне почиваяй: Троице Святая, слава Тебе.

Вход. Свете тихий: Прокимен дне, и чтения.

Числ чтение. [Глава 11.]

Рече Господь к Моисею: собери Ми семьдесят мужей от старец израилевых, ихже ты сам веси, яко сии суть старцы людей, и книжники их: и приведши их в сень свидения, и станут ту с тобою. И сниду и возглаголю тамо с тобою, и отиму от Духа сущаго в тебе, и возложу на них, и пособствуют с тобою стремления людей, и не поводиши их ты един. И собра Моисей семьдесят мужей от старец людей, и постави их окрест сени. И сниде Господь во облаце, и глагола Моисею, и взят от Духа Иже в нем, и положи на седмидесяти мужей старец: а якоже почи Дух на них, и прорекоша в стану, и ктому не приложиша. И осташа два мужа в стану, имя единому Елдад, и имя второму Модад, и почи на них Дух: и сии беша от написанных, и не приидоша в сень, и пророчествоваста в стану. И притек юноша возвести Моисею, и рече ему, глаголя: Елдад и Модад пророчествуеа в стану. И отвещав Иисус сын Навин, предстояй Моисею, избранный его, рече: господи Моисее, возбрани има. И рече ему Моисей: не ревнуеши ли ты мне? И кто даст всем людем Господним быти пророки, егда даст Господь Духа Своего на них?

Пророчества Иоилева чтение. [Глава 2.]

Тако глаголет Господь: чада Сионова радуйтесь, и веселитесь о Господе Боже вашем: яко даде вам брашна в правду, и одождит вам дождь ранний и поздний, якоже прежде. И наполнятся гумна пшеницы, и излиются точилия вина и елеа. И вдам вам вместо лет ихже поядоша пружи и гусеницы, и ржа и хрустове, сила Моя великая, юже послах на вы. И снете ядуще и насытитесь, и похвалите имя Господа Бога вашего, Иже сотвори свыше чудеса: и не постыдятся людие Мои в век. И разумеете, яко посреде Израиля Аз есмь, и Аз Господь Бог ваш, и несть иного разве Мене: и не постыдятся ктому людие Мои в век. И будет по сих, излию от Духа Моего на всякую плоть, и прорекут сынове ваши и дщери ваша, и старцы ваши сония видят, и юноши ваши видения узрят. Ибо на рабы Моя, и на рабыни Моя во дни оны излию от Духа Моего, и прорекут. И дам чудеса на небеси горе, и знамения на земли низу, кровь и огонь, и курение дыма. Солнце преложится во тму, и луна в кровь, прежде пришествия дне Господня великаго и страшнаго. И будет всяк, иже аще призовет имя Господне, спасется.

Пророчества Иезекиилева чтение. [Глава 36.]

Тако глаголет Господь: приму вас от язык, и соберу вы от всех язык странных, и введу вы в землю вашу, и окроплю на вы чистую воду, и очиститесь от всех нечистот ваших, и от всех идол ваших, и очищу вы. И дам вам сердце новое, и дух новый дам вам, и отиму сердце каменное от плоти вашей, и дам вам сердце плотное, и Дух Мой дам в вас: И сотворю, да во оправданиях Моих ходите, и судьбы Моя сохраните, и сотворите. И вселитесь в землю, юже дах отцем вашим, и будете Ми в люди, и Аз буду вам в Бога.

На литии стихиры глас 2-й:

Во пророцех возвестил еси нам путь спасения, и во апостолах возсия Спасе наш, благодать Духа Твоего. Ты еси Бог первый, Ты и по сих, и во веки Ты еси Бог наш.

Во дворех Твоих воспою Тя Спаса мира, и преклонь колена, поклонюся Твоей непобедимей силе, вечер, и утро, и полудне, и на всякое время благословляю Тя, Господи.

Во дворех Твоих Господи, вернии, колена душ и телес преклонше, воспеваем Тя безначальнаго Отца, и собезначальнаго Сына, и соприсносущнаго и Пресвятаго Духа, просвещающаго и освящающаго души наша.

Слава, и ныне: глас 8-й:

Егда Духа Твоего послал еси Господи, сидящим апостолом, тогда еврейския дети зряще ужасавшася ужасом: слышаху бо я вещающа иными странными языки, якоже Дух подаваше им. Невежди бо суще умудришася, и языки в веру уловивше, божественная витийствоваху. Темже и мы вопием Ти: Иже на земли явлейся, и от прелести спасый нас, Господи слава Тебе.

На стиховне стихиры самогласны, глас 6-й:

Не разумеюще языцы Господи, Пресвятаго Духа на апостолы Твоя бывшия силы, изменение язык пиянство быти мняху. Мы же утвердившеся о них, непрестанно сие глаголем: Духа Твоего Святаго не отими от нас, молим Ти ся Человеколюбче.

Стих: Сердце чисто созижди во мне, Боже, и дух прав обнови во утробе моей.

Господи, Святаго Духа нашествие, апостолы Твоя исполнившее, иными языки глаголати устрои. Темже преславное, неверным убо пиянство мняшеся, верным же ходатайственно спасения: егоже сияния и нас сподоби, молим Ти ся Человеколюбче.

Стих: Не отвержи мене от лица Твоего, и Духа Твоего Святаго не отыми от мене.

Царю Небесный, Утешителю, Душе истины, Иже везде сый, и вся исполняяй, Сокровище благих, и жизни Подателю, прииди и вселися в ны, и очисти ны от всякия скверны, и спаси Блаже души наша.

Слава, и ныне: глас 8-й:

Языцы иногда размесишася, дерзости ради столпотворения: языцы же ныне умудришася, славы ради боговедения. Тамо осуди нечестивыя погрешением: zde просветил есть Христос рыбаи Духом. Тогда упразднися безгласие к мучению: ныне обновляется согласие ко спасению душ наших.

Отпустительный тропарь, глас 8-й:

Благословен еси Христе Боже наш, Иже премудры ловцы явлей, низпослав им Духа Святаго, и теми уловлей вселенную, Человеколюбче слава Тебе. [Трижды.]

Таже благословение хлебов.

[зри] Аще ли не будет бдения: По Ныне отпускаеши: тропарь праздника единойды. На повечерии, по Достойно: и по трисвятом, кондак праздника. Полунощницу поем по обычаю.

Канон глаголем троичен во октоихе, гласа.

НА УТРЕНИ

На Бог Господь: тропарь праздника, глас 8-й:

Благословен еси Христе Боже наш, Иже премудры ловцы явлей, низпослав им Духа Святаго, и теми уловей вселенную, Человеколюбче слава Тебе. [Трижды.]

По 1-м стихословии седален, глас 4-й:

Подобен: Удивися Иосиф:

Попразднственный вернии, и конечный праздник празднуим светло, сей есть Пятидесятница, обещания исполнение и предложения: в сей бо огонь Утешителей сниде на землю, яко в виде язык, и ученики просвети, и сия неботаинники показа. Свет прииде Утешителя, и мир просвети.

Слава, и ныне, тойже:

По 2-й кафисме седален, глас 8-й:

Подобен: Удивися Иосиф:

Духа источник прииде на землю, во огненные реки разделяясь мысленно, апостолы орошаше просвещая: и бысть им облак орошай огонь, просвещаяй тех, и одождаяй пламень, имиже мы прияхом благодать, огнем же и водою. Свет прииде Утешителя, и мир просвети.

Слава, и ныне, тойже:

Полиелей, и абие Величание:

Величаем Тя, Живодавче Христе, и чтим Всесвятаго Духа Твоего, Егоже от Отца послал еси Божественным учеником Твоим.

Псалом избранный: Небеса поведают славу Божию, творение же руку Его возвещает твердь.

По полиелей седален, глас 8-й:

Подобен: Повеленное тайно:

По востании Христе, еже от гроба, и еже к высоте небесной божественном вознесении, боговидцем славу Твою низпослал еси Щедре, Духа праваго обновивый учеником. Темже яко гусли мусикийская, всем уяснися божественным бряцалом тайно Спасе глашения, и смотрение Твое.

Слава, и ныне, тойже:

Степенна, 1-й антифон 4-го гласа.

Прокимен, глас 4-й: Дух Твой благий наставит мя на землю праву.

Стих: Господи услыши молитву мою, внуши моление мое. Всякое дыхание:

Евангелие Иоанна, зачало 65:

Сущу позде в день той во едину от суббот, и дверем затворенным, идеже бяху ученицы Его собрани, страха ради Иудейска, прииде Иисус и ста посреде и глагола им: мир вам. И сие рек, показа им руце и нозе и ребра Своя. Возрадовахся убо ученицы, видевше Господа. Рече же им Иисус паки: мир вам, якоже посла Мя Отец, и Аз посылаю вы. И сие рек, дуну и глагола им: примите Дух Свят, имже отпустите грехи, отпустятся им, и имже держите, держатся.

Воскресение Христово: не глаголем.

Абие псалом 50.

Таже, Слава: Молитвами апостол:

И ныне: Молитвами Богородицы:

Таже стих: Помилуй мя Боже:

Стихира, глас 6-й: Царю Небесный, Утешителю, Душе истины, Иже везде сый, и вся исполняяй, Сокровище благих, и жизни Подателю, прииди и вселися в ны, и очисти ны от всякия скверны, и спаси Блаже души наша.

Канона праздника два. Ирмосы обою канонов по дважды, а тропари на 12. Последи же един лик, 1-й ирмос: и другой лик, другой ирмос.

Песнь 1. Глас 7-й:

Ирмос: Понтом покры фараона с колесницами сокрушая брани мышцею высокою, поим Ему, яко прославися.

Делом, якоже древле учеником обещал еси, Утешителя Духа пославый Христе, возсиял еси миру свет Человеколюбче.

Законом древле проповеданное и пророки, исполнися: Божественного бо Духа днесь всем верным благодать излиися.

Иный канон

Глас 4-й:

Ирмос: Божественным покровен медленоязычный мраком, извитийствова богописанный закон: тину бо оттряс очесе умнаго, видит Сущаго, и научается Духа разуму, хваля Божественными песньми.

Рекоша чистая и честная уста: разлучения вам не будет, о друзи! Аз бо на Отчем вышнем престоле соседя, излию Духа, возсияти желающим благодать независтную.

Предел прешедшее истиннейшее Слово, тихообразно совершает сердце: дело бо скончав, возвесели друзи, дыханием нужным и огненными языки, подав Духа Христос, якоже обещася.

Катавасия: Божественным покровен ...,

Песнь 3.

Ирмос: С высоты силою, учеником Христе, дондеже облецетесь, рекл еси, сидите во Иерусалиме: Аз же яко Мене, Утешителя иного, Духа Моего же и Отца пошлю, в Немже утвердитесь.

Божественного Духа нашедшая сила, раздельшийся древле глас, зле согласившихся, во едино приличие божественне совокупи, ведением Троицы вразумляюще верныя, в Нейже утвердихомся.

Ин.

Ирмос: Разверзе утробы нечадствовавшия узы, досаду же неудоботерпиму благочадствующия, едина молитва пророчицы древле Анны, носящия дух сокрушен, к сильному и Богу разумов.

Непостижима есть Богоначальнейшая: ветия бо изъяви безкнижныя, рыбари премудрыя, заушающия словом, и от глубокия нощи изимающия люди безчисленны, блистанием Духа.

Бяше исходен от нерожденна Света, всесильный сияющий Свет, Егоже Сыном Отеческия власти, ныне являет срасленное озарение, огненный глас в Сионе языком.

Катавасия: Разверзе утробы ...,

Таже седален, глас 8-й:

Подобен: Повеленное тайно:

Спасовы рачителие радости исполнишася, и дерзновение прияша, прежде боящихся: яко Дух Святый днесь свыше сниде на дом ученический, и ин иная глаголаше к людям. Языцы бо разсеяшася, видими яко огонь: и сих не опали, но паче ороси.

Слава, и ныне: тойже.

Песнь 4.

Ирмос: Смотриай пророк в последняя Твое Христе пришествие, вопияше: Твою услышах Господи силу, яко вся спасти помазанныя Твоя пришел еси.

Во пророцех глаголавый, и законом проповеданный первее несовершенным, Бог Истинный Утешитель, Слова служителем и свидетелем познавается днесь.

Знамение Божества носяй, апостолом во огни, Дух разделися, и странными языки являшеся, яко Отеческая Божественная сила грядущая есть, самоповелительная.

Ин.

Ирмос: Царю царей, яковый от яковаго един Слове произшедый от Отца безвиновнаго, равномошнаго Твоего Духа апостолом истинно послал еси, яко Благодетеля поющим: слава державе Твоей Господи.

Баню Божественную пакибытия словом растворив, ссложенное естество, дождоточиши ми струю от нетленнопрободеннаго Твоего ребра, о Божий Слове, запечатлея теплотою Духа.

Преклоняют вся Утешителю колена, Сыну же Отчу, Отцу срасленному, в Лицех бо видеша трегубых Существо истинное, неприкосновенное, безлетное, единое: возсия бо свет благодать Духа.

Да исполнятся вси Богоначальнейшим, елицы служителие Трисветлаго Существа: паче естества бо совершает яко благодетель, и огнесветит Христос во спасение, всю дая благодать Духа.

Катавасия: Царю царей ...,

Песнь 5.

Ирмос: Страха ради Твоего зачатый Господи во чреве пророков, и рожденный на земли Дух спасения, апостольская сердца созидает чиста, и в верных правый обновляется: свет бо и мир зане Твоя повеления.

Нашедшая сила днесь сия, Дух Благий, Дух премудрости Божия, дух от Отца исходяй, и Сыном верным нам явлейся подавателен, в нихже вселяется естеством святыни, в нейже зрится.

Ин.

Ирмос: Решительное очищение грехов, огнедухновенную примите Духа росу, о чада светообразная церковная: ныне от Сиона бо изыде закон, языкоогнеобразная Духа благодать

Якоже благоволи самовластно, необладанный исходит Дух от Отца, умудряя в языцех апостолы, печатлея живоносное Слово, Отчесильное, сообразное, Егоже Спас рече.

Да исцелит убо смыслы от греха, и се устрояше апостолов, Бог Слово всенаачальное, пречистый дом, в немже единомощнаго же и ссущественнаго ныне вселяется Духа свет.

Катавасия: Решительное очищение ...,

Песнь 6.

Ирмос: Плавающего в молве житейских попечений, с кораблем потопляема грехи, и душетленному зверю приметаема, яко Иона Христе, вопию Ти: из смертоносныя глубины возведи мя.

От Духа Твоего на плоть всякую, якоже рекл еси, богато излиал еси, и исполнишася всяческая Твоего ведения, Господи, яко из Отца Сын нетленно родился еси, и Дух нераздельный изыде.

Ин.

Ирмос: Очищение нам Христе и спасение Владыко, возсиял еси от Девы, да яко пророка от зверя морского персей Иону, от тли исхитиши, всего Адама всеродна падшаго.

Истинный нам правый во утробах вечно приимшым Дух, да обновиши Отчеходный, и всевокупленно, вещества ненавистнаго палительный скверн, кала же смыслов чистительный, Вседержителю.

Желательное достояние апостолом, сионяном чающим Твоего пришествия, познание Дух Отчорожденна Слова, речь жестокою языческих ласкательств скоро показав, огнедохновенно утверждаети.

Катавасия: Очищение нам ...

Кондак, глас 8-й:

Егда снизшед языки слия, разделяше языки Вышний: егда же огненные языки раздаяше, в соединение вся призва, и согласно славим Всесвятаго Духа.

Икос: Скорое и известное даждь утешение рабом Твоим Иисусе, внегда унывати духом нашим, не разлучайся от душ наших в скорбех, не удаляйся от мыслей наших во обстояниях: но присно нас предвари. Приблизися нам, приблизися везде Сый, якоже со апостолы Твоими всегда еси, сице и Тебе желающим соедини Себе Щедре: да совокуплени Тебе поем, и славословим Всесвятаго Духа Твоего.

Синаксарий, в Неделю Святыя Пентикостии.

Стихи: Дыханием нужным, языкоогненно подает

Стихи: Христос Божественнаго Духа апостолом Излияся в великом дни дух рыбарем.

В сий день, в Неделю осмую по Пасце, Святую Пятдесятницу празднуем, и сию же прияхом от еврейских книг. Якоже бо они, яже у них Пятдесятницу празднуют, почитающе седмое число, и зане по Пасце пятьдесят дний прешедше, закон прияха: тако и мы по Пасце, пятьдесят дний празднующе, Всесвятаго Духа приемлем, законополагающаго и наставляющаго на всякую истину, и угодная Богу повелевающаго. Ведомо же да есть, яко у еврей три беша праздники: Пасха, Пятдесятница и Скинопигия, сиесть, сениц потчение. Пасху убо в воспоминание творяху преведения Чермнаго моря: пасха бо преведение толкуется. Являше же таковой праздник, наше еже от темнаго греха к раю паки преведение и возвращение. Пятдесятницу же праздноваху, в воспоминание еже в пустыни злострадания их, и како многими скорбьми в землю обетования введени быша: тогда бо и плода пшеницы и вина насладишася. И являше праздник сей наше озлобление от неверия, и в Церковь внитие: тогда бо и мы Владычняго причащаемся Тела и Крове. Ови убо тоя ради вины глаголют, яже у еврей Пятдесятнице праздноватися: ови же в честь якоже глаголют, пятидесятым днем, в няже постився Моисей, Богописанный закон прият, вкупе поминающим и тельца жрения, и иных, яже егда Моисей восходя на гору, и низходя содея. Другим же непщевася Пятдесятнице у еврей умыслитися, чести ради седмичнаго числа, якоже речеса: то бо о себе слагаемо, творит пятьдесятное, единому

оскудевающу дневи. Честь же седмочислия у еврей, не точию во днех есть, но и в лета достигающая, от нихже лет и еже у них творят новилеон, сказуемо оставление. уседморичаемым бо летом, сие бывает, егда и землю несеянную оставляют, и животным подают ослабу, и купленным рабом отходить повелевают. Третий же праздник, Скинопигия, сиесть, сениц потчение, празднуемый по собрании плодов, еже есть по пятих месяцах праздника Пасхи. Совершаше же ся сей в память дне, воньже Моисей прежде потче сеницу на горе Синайстей виденную облаком, и уготованную от перводреводея веселила: сени бо и сии творяще, сей праздник праздноваху и на селех пребывающе, и благодаряще Бога, плоды своих трудов собираху. В сий мнится и Давид яже о точилех надписовати псалмы. Образ же бе той из мертвых нашего воскресения, егда разрушившимся телесным сенем нашим, и паки слепленным, своих трудов плоды восприимем, торжествующе в вечных сенех. Подобаеет же ведати, яко в сий день Пятидесятницы совершаемая, Дух Святой на ученики прииде. Елма же святии отцы изволиша разделяти праздники, ради величия Пресвятаго и Животворящаго Духа, яко Един есть Святыя и Живоначальныя Троицы. Се и мы речем воутрие, како Дух Святой прииде.

Святых апостол молитвами Христе

помилуй нас. Аминь.

Песнь 7.

Ирмос: В печь огненную ввержени преподобнии отроцы, огонь в росу преложиша, воспеванием сице вопиюще: благословен еси Господи Боже отец наших.

Ветующим Божественная величия апостолом, Духа действо неощевавшееся пиянство неверствующим, имже Троица познавается, един Бог отец наших.

Нераздельное естество православно богословим Бога Отца Безначального, тояжде власти Слова и Духа, благословен еси, зовуще, Боже отец наших.

Ин.

Ирмос: Согласно возпуме органская песнь, почитати златосотворенный бездушный истукан: Утешителя же светоносная благодать почествует, еже вопити: Троице Единая, Равносильная, Безначальная, благословена еси.

Гласа пророковещательнаго не разумевше, глаголаху безумнии виносотворенное пиянство, речи яко странны слышаша апостолов: благочестивии же Тебе вопием божественно: Богодетелю всех благословен еси.

Божественное учение возгреме видяй видения божественный Иоиль, Богоначальнейшаго, имже излию, рек, якоже Слова, Духа Моего свозопиющим: Естество Тривещанное Светлое, благословен еси.

Троичную убо раздели зря благодать, яко да явит три Ипостаси, почитати в простоте власти, но во едином ныне дни Господском, Сын, Отец и Дух благословен.

Катавасия: Согласно возшуме ...,

Песнь 8.

Ирмос: Неопальная огню в Синаи причащшаяся купина, Бога яви медленоязычному и гугнивому Моисеови, и отроки ревность Божия три непроборимыя во огни певцы показа: вся дела Господня Господа пойте, и превозносите во вся веки.

Животну свыше бурну носиму гласовне, Духа Всесвятаго дыханию рыбарем, огненных видом язык величия Божия ветийствоваху: вся дела Господа пойте, и превозносите во вся веки.

Яко на некасаемую превосходяще гору, не боящися огня страшаща, приидите и станем на горе Сионской, во граде Живаго Бога, духоносным учеником ныне сликующе: вся дела Господа пойте, и превозносите во вся веки.

Ин.

Ирмос: Разрешает узы, и орошает пламень трисветлый богоначалия образ, поют отроцы, благословит же Единого Спаса и Вседетеля, яко Благодетеля, сотворенная всяческая тварь.

Память Христос человекоспасительных словес, яже от Отца слышав апостолом рече, Дух устрояет языкоогненным видением, посаждая благословенно усвоенную, учуженная же поет Тя тварь.

Спасительно самовладычный Един, Свет самосиятельный, и подательный света сый, пришел еси исполняя апостолы, честный яко верх Твоим рабом, насытителный же Дух подаваеши.

Пояху пророк духонасыщенная уста, Твое телесное, о Царю, пришествие, и Дух от недр Отчих произшедший, несозданный, зданнодетелен, сопрестолен Тебе, единого вочеловечения верным честь.

Катавасия: Разрешает узы ...,

Честнейшую: не поем.

Песнь 9.

Ирмос: Не тления искушением рождающая, и Всехитрецу Слову плоть взаимоотношавшая, Мати Неискусомужная Дево Богородице, приятелище Нестерпимаго, село Невместимаго Зиждителя Твоего, Тя величаем.

На палящей древле огненной колеснице, ревнитель и огнедохновенный радуясь носимь, еже ныне возсиявшее дохновение свыше апостолом являше: от негоже освятившися, Троицу всем сказах.

Закон естеств кроме, странное слышашеся учеников: единому бо гласу гласящу Духа благодатию, различне оглашахуся людие, племена и языки божественная величия, Троицы ведению научающе.

Ин.

Ирмос: Радуйся Царице, матеродевственная славо: всяка бо удобообращательная благоглаголивая уста витийствовать не могут, Тебе пети достойно: низумевает же ум всяк Твое Рождество разумети. Темже Тя согласно славим.

Пети подобаше естественнोजизненную Отроковицу: едина бо во чреве скры Слово, таящееся недугующаго человеческого естества. Иже в десных странах ныне седяй Отчих, посла благодать Духа.

Елицем дхну боготочная благодать, светящися, блистающе, изменяеми странным изменением благолепнейшим, равносильствующую несекому уведевши премудрость, Трисветлое существо славим.

Катавасия: Оба ирмоса вкупе.

Ексапостиларий. Подобен: Небо звездами:

Всесвятый Душе, исходяй из Отца и Сыном пришедый к безкнижным учеником, Тебе Бога познавших спаси и помилуй всех. [Дважды.]

Слава, и ныне: другой подобен:

Свет Отец, Свет Слово, Свет и Святой Дух, Иже во языцех огненных апостолом послася. И Тем весь мир просвещается Троицу почитати Святую.

На хвалитех, Всякое дыхание: поставим стихов 6, и поем настоящия самогласны, глас 4-й, повторяюще я:

Преславная днесь видеша вси языцы во граде Давидове, егда Дух сниде Святой во огненных языцех, якоже богоглаголивый Лука повествует, глаголет бо: собранным учеником Христовым, бысть шум, якоже носиму дыханию бурну, и исполни дом, идеже бяху седяще: и вси начаша глаголати странными глаголы, странными учении, странными повелении Святыя Троицы. [Дважды.]

Дух Святой бе убо присно, и есть, и будет: ниже начинаемь, ниже престаяй, но присно Отцу и Сыну счинен и счисляемь: Живот, и животворяй: Свет, и света податель, самоблагий, и источник благостыни: Имже Отец познавается, и Сын прославляется, и от всех познавается, едина сила, едино счетание, едино поклонение Святыя Троицы. [Дважды.]

Дух Святой Свет и Живот, и живой источник умный: Дух премудрости, Дух разума, благий, правый, умный: обладай, очищай прегрешения: Бог и боготворяй, Огнь от Огня исходяй: глаголай, дей, разделяй дарования, Имже пророцы вси, и божественнии апостоли с мученики венчашася, странное слышание, странное видение, огнь разделяйся в подавание дарований. [Дважды.]

Слава, и ныне: глас 6-й:

Царю Небесный, Утешителю, Душе истины, Иже везде сый, и вся исполняй, Сокровище благих, и жизни Подателю, прииди и вселися в ны, и очисти ны от всякия скверны, и спаси Блаже души наша.

Славословие великое. Отпустительный тропарь праздника, глас 8-й:

Благословен еси Христе Боже наш, Иже премудры ловцы явлей, низпослав им Духа Святаго, и теми уловлей вселенную, Человеколюбче слава Тебе.

Таже, ектении. И творит священник отпуст сице:

Священник: **И**же в виде огненных язык, с небесе низпославый Пресвятаго Духа на святых Своя ученики и апостолы, Христос истинный Бог наш, молитвами Пречистыя Своея Матере, святых славных и всехвальных апостол, и всех святых, помилует и спасет нас, яко Благий и Человеколюбец.

И час 1. На 1-м часе тропарь праздника.

По трисвятом кондак праздника. И конечный отпуст.

НА ЛИТУРГИИ

Глаголем антифоны сия.

Антифон 1, псалом 18, глас 2-й:

Стих 1: Небеса поведают славу Божию, творение же руку Его возвещает твердь.

Припев: Молитвами Богородицы, Спасе спаси нас.

И другой лик, тойже стих:

Стих 1: Небеса поведают славу Божию, творение же руку Его возвещает твердь.

Припев: Молитвами Богородицы, Спасе спаси нас.

Стих 2: День дни отрыгает глагол, и ночь ночи возвещает разум. Молитвами Богородицы, Спасе спаси нас.

Припев: Молитвами Богородицы, Спасе спаси нас.

Стих 3: Во всю землю изыде вещание их, и в концы вселенныя глаголы их. Молитвами Богородицы, Спасе спаси нас.

Припев: Молитвами Богородицы, Спасе спаси нас.

Слава, и ныне: Молитвами Богородицы, Спасе спаси нас.

Антифон 2, псалом 19, глас 2-й:

Стих 1: Услышит тя Господь в день печали защитит тя имя Бога Иаковля

Припев: Спаси ны Утешителю Благий поющия Ти: аллилуиа.

Другая страна тойже стих:

Стих 1: Услышит тя Господь в день печали защитит тя имя Бога Иаковля

Припев: Спаси ны Утешителю Благий поющия Ти: аллилуиа.

Стих 2: Послет ти помощь от Святаго, и от Сиона заступит тя.

Припев: Спаси ны Утешителю Благий поющия Ти: аллилуиа.

Стих 3: Даст ти Господь по сердцу твоему, и весь совет твой исполнит. Спаси ны Утешителю Благий:

Слава, и ныне: Единородный Сыне:

Антифон 3, псалом 20, глас 8-й:

Стих 1: Господи, силою Твоею возвеселится царь Господи, силою Твоею возвеселится царь, и о спасении Твоем возрадуется зело

Тропарь, глас тойже: Благословен еси Христе Боже наш, иже премудры ловцы явлей, низпослав им духа святаго, и теми уловлей вселенную, Человеколюбче слава Тебе.

Другий лик, тойже стих:

Стих 1: Господи, силою Твоею возвеселится царь Господи, силою Твоею возвеселится царь, и о спасении Твоем возрадуется зело

Тропарь: Благословен еси Христе Боже наш:

Стих 2: Желание сердца его дал еси ему, и хотения устну его неслишил его.

Тропарь: Благословен еси Христе Боже наш:

Стих 3: Яко предварил еси его благословением благостынным, положил еси на главе его венец от камене честна.

Тропарь: Благословен еси Христе Боже наш:

Входное: Вознесися Господи силою Твоею, воспоем и поем силы Твоя.

Таже, Тропарь, глас 8-й: Благословен еси Христе Боже наш, иже премудры ловцы явлей, низпослав им духа святаго, и теми уловлей вселенную, Человеколюбче слава Тебе.

Слава, и ныне: Кондак, глас тойже:

Егда снизшед языки слия, разделяше языки вышний: егда же огненные языки раздаяше, в соединение вся призва, и согласно славим всесвятаго Духа.

Вместо же трисвятаго: Елицы во Христа креститесь, во Христа облекостесь, аллилуиа.

Прокимен, глас 8-й: Во всю землю изыде вещание их, и в концы вселенныя глаголы их. [И до отдания.]

Стих: Небеса поведают славу Божию, творение же руку Его возвещает твердь.

Апостол в деяниях, зачало 3: (Деян. 2:1-11)

Во дни оны, егда скончавашася дние Пятидесятницы, беша вси апостоли единодушно вкупе. И бысть внезапно с небесе шум, яко носиму дыханию бурну, и исполни весь дом, идеже бяху сядуще, и явишася им разделени языцы яко огненни, седе же на едином коемждо их. И исполнишася вси Духа Свята и начаша глаголати иными языки, якоже Дух даяше им провещавати. Бяху же во Иерусалиме живущии иудее, мужие благоговейнии, от всего языка, иже под небесем. Бывшу же гласу сему, снидеша народ и смятеша, яко слышаху един кийждо их своим языком глаголющих их. Дивляхуся же вси и чудяхуся, глаголюще друг ко другу: не се ли, вси сии суть глаголющии галилеане? И како мы слышим кийждо свой язык наш, в немже родихомся, парфяне и мидяне и еламиты, и живущии в Месопотамии, во Иудеи же и Каппадокии, в Понте и во Асии, во Фригии же и Памфилии, во Египте и странах Ливии, яже при

Киринии, и приходящие римляне, иудеи же и пришельцы, критяне и аравляне, слышавшие глаголющих их нашими языками величия Божия?

Аллилуиа, глас 1-й: Словом Господним небеса утвердишася, и Духом уст Его вся сила их.

Стих: С небесе призре Господь, виде вся сыны человеческия.

Евангелие от Иоанна, зачало 27: (Ин. 7:37-52, 8:12)

В последний день великий праздника стояше Иисус и зваше, глаголя: аще кто жаждет, да приидет ко Мне и пьет. Веруй в Мя, якоже рече Писание, реки от чрева его истекут воды живы. Сие же рече о Дусе, Егоже хотяху приимати верующии во имя Его, не у бо бе Дух Святыи, яко Иисус не у бе прославлен. Мнози же от народа слышавше слово, глаголаху: Сей есть воистинну пророк. Другии глаголаху: Сей есть Христос. Овии же глаголаху: еда от Галилеи Христос приходит? Не Писание ли рече, яко от семени Давидова и от Вифлеемския веси, идеже бе Давид, Христос приидет? Распря убо бысть в народе Его ради. Нецыи же от них хотяху яти Его, но никтоже возложи Нань руще. Приидоша же слуги ко архиереом и фарисеом, и реша им тии: почто не приведосте Его? Отвещаша слуги: николиже тако есть глагола человек, яко Сей Человек. Отвещаша убо им фарисее: еда и вы прельщени бысте? Еда кто от князь верова в Онъ, или от фарисей? Но народ сей, иже не вестъ закона, прокляти суть. Глагола Никодим к ним, иже пришедый к Нему нощию, един сый от них: еда закон наш судит человеку, аще не слышит от него прежде и разумет, что творит? Отвещаша и рекоша ему: еда и ты от Галилеи еси? Испытай и виждь, яко пророк от Галилеи не приходит. Паки же им Иисус рече глаголя: Аз есмь свет миру, ходяй по Мне не имать ходити во тме, но имать свет животный.

За Достойно: поем и до отдания ирмос:

Ирмос: Радуйся Царице, мате родевственная славо: всяка бо удобообращательная благоглаголивая уста витийствовати не могут, Тебе пети достойно: низумевает же ум всяк Твое Рождество разумети. Темже Тя согласно славим.

Причастный: Дух Твой Благий наставит мя на землю праву. Аллилуиа.

И по отпусте на литургии глаголется 9-й час по обычаю.